

ꦲꦮꦶꦒꦲꦮꦶꦒ

AWIG-AWIG

ꦒꦏꦫꦩꦤ꧀ꦠꦁꦧꦤꦶꦗꦫꦤ꧀

DESA PAKRAMAN TABU BANJARAAN



ꦏꦺꦴꦏꦩꦠꦤ꧀ꦏꦧꦸꦥꦠꦺꦤ꧀ꦏꦭꦸꦁꦏꦸꦁ

Kecamatan lan Kabupaten Klungkung

ꦧꦩꦶꦁꦠꦺꦤ꧀

Warsa 2016

MURDHA CITHA

Om Swastyastu,

Tityang Desa Pakraman Tabu Banjaraan wyakti dahat angayu bagya pisan, miwah ngaturang suksmaning manah majeng ring Ida Sang Hyang Widhi Wasa, dwaning maiarapan antuk Asung Wara Nugrahan Ida, Desa Pakraman Tabu Banjaraan, Desa Dinas Selat Kecamatan Klungkung lan Kabupaten Klungkung prasida mangguh rahayu, saha gilik saguluk sajeroning paruman, sareng sami satinut pacang ngentosin Awig-awig Desa Pakraman. Melarapan antuk pamutus paruman punika, Desa Pakraman Tabu Banjaraan raris ngaryanin Awig-awig puniki kaangge pinaka sepat siku-siku risajeroning ngelaksanayang swadharma pinaka krama utawi Bandesa miwah Prajuru Desa Pakraman.

Yadiastun Awig-awig puniki durung paripurna, dumadak dumadik Ida Sang Hyang Widhi Wasa, satata ngicen kadegdegan manah krama sareng sami mangda prasida ngulati tatujon urip manut agama.

Om Santhi, Santhi, Santhi Om.

DAGING BUKU
AWIG-AWIG DESA PAKRAMAN TABU BANJARAAN

| | | |
|----|---|----|
| 1. | MURDA CITTA | ha |
| 2. | DAGING BUKU | na |
| 3. | PRATHAMAS SARGAH : ARAN LAN WAWIDANGAN DESA .. | 1 |
| 4. | DWI TISYAS SARGAH : PATITIS LAN PAMIKUKUH | 2 |
| 5. | TRITISYAS SARGAH : SUKERTA TATA PAKRAMAN | 3 |
| | Palet 1 Indik Warga lan Krama | 3 |
| | Palet 2 Indik Prajuru | 13 |
| | Palet 3 Indik Kulkul | 19 |
| | Palet 4 Indik Paruman Desa | 21 |
| | Palet 5 Indik Druwen Desa | 23 |
| | Palet 6 Indik Sukerta Pamitegep | 25 |
| 6. | CATURTHAS SARGAH : SUKERTA TATA AGAMA | 31 |
| | Palet 1 Indik Dewa Yadnya | 31 |
| | Palet 2 Indik Resi Yadnya | 37 |
| | Palet 3 Indik Pitra Yadnya | 39 |
| | Palet 4 Indik Manusa Yadnya | 43 |
| | Palet 5 Indik Buta Yadnya | 44 |
| 7. | PANCAMAS SARGAH : SUKERTA TATA PAWONGAN | 46 |
| | Palet 1 Indik Pawiwahan | 46 |
| | Palet 2 Indik Nyapihan | 50 |
| | Palet 3 Indik Sentana | 52 |
| | Palet 4 Indik Warisan | 55 |

| | |
|--|----|
| 8. SADTHAS SARGAH : WICARA LAN PAMIDANDA | 57 |
| Palet 1 Indik Wicara | 57 |
| Palet 2 Indik Pamidanda | 58 |
| 9. SAPTHAMAS SARGAH : NGUWAH-NGUWUHIN MIWAH NGEN- TOSIN AWIG AWIG | 60 |
| 10. ASTHAMAS SARGAH : PAMUPUT | 60 |

PRATHAMAS SARGAH
ARAN LAN WAWIDANGAN DESA

PAWOS 1

- (1) Desa Pakraman puniki mawasta Desa Pakraman Tabu Banjaraan.
- (2) Wates wawidangan desa Pakraman puniki nyatur desa luire :
 - ha. Wates sisi Lor : Banjar Palak Desa Pakraman Selat
 - na. Wates sisi Wetan : Tukad Kunyit
 - ca. Wates sisi Kidul : Banjar Yang Api miwah Desa Pakraman Manduang
 - ra. Wates sisi Kulon : Tukad Toya Bulan Desa Pakraman Selisihan

PAWOS 2

- (1) Desa Pakraman Tabu Banjaraan gilik dados abanjar.
- (2) Desa Pakraman Tabu Banjaraan ngawengku :
 - ha. Pura – pura :
 - 1. Pura Kahyangan Tiga
 - 2. Padmasana, Melanting miwah Bale Patok.
 - 3. Pura Dadia, Pura Paibon lan Pura Ulun Carik utawi Pura Bedugul.
 - na. Tanah :
 - 1. Tanah carik druwen Desa
 - 2. Tanah Bale Desa

3. Tanah Setra
4. Tanah margi, rurung lan telabah
5. Tanah pekarangan Desa
6. Tanah carik lan tegal
7. Tanah sekolah druwen Desa.

PAWOS 3

Wawidangan Desa Pakraman Tabu Banjaraan kalinggihin olih :

- ha. Krama Desa Mawed
- na. Krama Desa tan mawed

DWITYAS SARGAH

PATITIS LAN PAMIKUKUH

PAWOS 4

Patitis Desa Pakraman Tabu Banjaraan luire :

- ha. Mikukuhin miwah ngajegang Agama Hindu
- na. Nginggilang tata prawertine maagama Hindu.
- ca. Ngajegang kasukertan Desa saha pawongannya sami sakala lan niskala
- ra. Ngajegang tata pangaskaraning pawongan, pamekas sane ngiket kulawarga pasuka dukan
- ka. Ngajegang kasukertan saraja druwen Desa miwah druwen pawongannya sami

PAWOS 5

Desa Pakraman Tabu Banjaraan mikukuhin lan ngamanggehang dasar :

- ha. Pancasila
- na. Undang Undang Dasar Negara Republik Indonesia Tahun 1945
- ca. Tri Hita Karana manut Sada cara Agama Hindu
- ra. Catur Dresta nganutin Sang Hyang Agama

TRITYAS SARGAH SUKERTA TATA PAKRAMAN

PALET 1 INDIK WARGA LAN KRAMA DESA

PAWOS 6

- (1) Sane kabawos Warga Desa Pakraman inggih punika :
Sahananing wong sane jumenek utawi tan jumenek ring wawidangan Desa Pakraman Tabu Banjaraan mawed saking Desa Pakraman Tabu Banjaraan satinut ring awig-awig, pararem lan pamargin Desa Pakraman.
- (2) Sane kabawos Krama Desa Pakraman inggih punika :
Sahananing wong maagama Hindu sane jumenek utawi tan jumenek ring Desa Pakraman Tabu Banjaraan, sane mipil, satinut ring awig-awig, pararem lan pamargin Desa Pakraman.
- (3) Sajaba wiwit (2) kabawos tamiu.

PAWOS 7

Krama Desa kapah dados nem soroh luire :

- ha. Krama ngarep ayah angkep inggih punika : Sahananing krama sane sampun jangkep alaki rabi miwah sane keangkepang jumenek ring wawidangan Desa Pakraman Tabu Banjaraan, nyungsung Kahyangan Tiga tur satinut ring daging awig-awig, pararem lan pamargin desa pakraman puniki.
- na. Krama silidihi utawi nyelosin inggih punika : krama sane katedunang dados krama ngarep melarapan antuk nyelidihi utawi nyelosin.
- ca. Krama ngarep ayah asibak : krama sane keni ayah lanang utawi ayah istri kewanten.
- ra. Krama ngarep ayah ngampel utawi melaga inggih punika : Krama sane jumenek ring dura Kabupaten sejawining Nusa Penida sakewanten ayah-ayahnya katawur antuk jinah manut pararem.
- ka. Krama ngarep ayah napuk inggih punika : Krama sane kalugra olih Prajuru nenten ngayahang desa sangkaning sakit tahunan.
- da. Krama pangele, nunggal lan kaputungan inggih punika : Krama sane nenten wenten nguwubang.

PAWOS 8

Ayah-ayah miwah peson-peson krama inggih punika :

- ha. Krama ngarep ayah angkep :
 - 1. Ngamargiang sehananing pidabdab Desa Pakraman.
 - 2. Ngamargiang ayah-ayah lanang miwah istri manut pamargin Desa Pakraman.
 - 3. Keni peson-peson napi luire manut pamargin Desa Pakraman.

na. Krama silidihi :

Ngemargiang sahananing pidabdab Desa Pakraman sekadi Krama ngarep angkep.

ca. Krama ngarep ayah asibak :

1. Keni ayah – ayah lanang utawi istri kewanten.
2. Keni peson-peson lan urunan manut pararem.

ra. Krama ngarep ayah ngampel utawi melaga :

1. Nenten keni ayah lanang utawi istri.
2. Keni jinah pengampel utawi melaga manut pararem.
3. Keni urunan sakaluir ipun manut pararem.
4. Jinah pangampel lan urunan inucap katawur ngamasa satunggil sasih kasanga.

ka. Krama ngarep ayah napuk :

1. Ayah-ayahnya katapuk.
2. Urunan miwah peson-peson napi luire keni sakadi patut, manut pamargin Desa Pakraman.

da. Krama pangele, nunggal lan kaputusan :

Luput ayah-ayah miwah peson-peson sakaluir ipun.

PAWOS 9

Swadarman krama Desa luire :

ha. Dreda atuang ring Desa.

na. Satinut ring daging awig-awig, ilikita, pararem lan paswara.

ca. Tan maren ngutsahayang mangda Desane prasida nyujur patitis.

- ra. Satinut tur satya ngalaksanayang sakeluir tatiwak Prajuru ritatkala ngenterang pamargin kertan Desane, kalih dadauhan Guru Wisesa.
- ka. Patut sareng natak panes tis kertan Desane.

PAWOS 10

Ngawit lan panemaya tedun makrama Desa luire :

ha. Kulawarga utawi anak-anaking krama Desa :

1. Sane jumenek ring Desa Pakraman Tabu Banjaraan lan sane magenah ring dura Desa, sampun alaki rabi patut tedun makrama desa.
2. Panamayanya tedun makrama Desa nyabran masa ring rahina Pecaruan Tilem Kasanga, polih panerag kawisan atanding.
3. Lian ring kecap wilangan 1 miwah 2 ring ajeng, mungguing panemayannya padgatakala.

na. Saking dura Desa kapatut :

1. Patilar rahayu saking Desa wed.
2. Kajangkepin antuk surat-surat keterangan Manggala Desa Pakraman lan Dinas.
3. Sampun jumenek ring Desa Pakraman Tabu Banjaraan sanistannya tigang sasih
4. Naur panaub pusaka lan wawangunan mawilang harga beras manut pararem.
5. Warga dura desa sane jumenek ring Desa Pakraman Tabu Banjaraan, sane sampun katapuk manut dresta, prade ngalimbak ngarangin saking karang wed patut katedunang dados krama sakadi wilangan 4.
6. Anak-anaking krama desa sane purusa, magenah ring jaba desa, wekasan yening sampun alaki rabi, patut tedun makrama desa. Sakewanten yening tan arep, wekasan yan mawali budal, arep pacang

makrama desa, patut keni panaub lan tulakwali mawilang harga beras manut pararem.

PAWOS 11

Tamiu lan swadarmannya :

- ha. Sane kabaos tamiu inggih punika : sang jumenek marerepan ring Desa Pakraman Tabu Banjaraan, sanistaninya awengi, malarapan saking malelungan, sasudiaan Desa utawi guru wisesa, duduk-dudukan, kawarga antuk sinalih tunggil krama Desa, ngarereh pangupa jiwa lan sane siosan.
- na. Krama sane nampi tamiu patut atur supeksa ring Prajuru Desa.
- ca. Swadarmen tamiu :
 - 1. Tamiu sasudian Guru Wisesa sane sampun alaki rabi, jumenek lintangan ring asasih pitung rahina patut naur jinah wawangunan nyabran sasih ring rahina saniscara kliwon mawilang harga beras manut pararem.
 - 2. Tamiu lian ring sasudian Guru Wisesa, sane sampun alaki rabi jumenek lintangan ring asasih pitung rahina patut naur jinah wawangunan nyabran sasih mawilang harga beras manut pararem.
 - 3. Yening tan satinut kecap wilangan 1 miwah 2 tan kalugra jumenek ring wawidangan Desa Pakraman Tabu Banjaraan.
 - 4. Polih pasayuban Desa sajeroning katiben baya.

PAWOS 12

Mararian dados Krama Desa :

- ha. Sangkaning pinunas ngaraga, santukan pacang magingsir genah ka jaba Desa, kapatut :
 - 1. Mapamit ring paruman krama desa.

2. Yening madruwe utang ring desa, patut kataur dumun.
3. Tan patut ngedum druwen desa.
4. Wekasan yening mawali budal, malih pacang tedun makrama desa, saking rahayu kapatut :
 - ha. Puput babawosan ring krama desa.
 - na. Naur tulak-wali manut pararem miwah awig-awig puniki.

na. Sangkaning kanorayang olih krama desa :

1. Tan satinut ring daging awig-awig, ilikita lan paswara.
2. Ageng kasisipannya majeng ring Desa .
3. Wicara sang pacang kanorayang, patut kebawosin ring paruman desa, prade tan puput wicara inucap katur ring sang rumawos adat.
4. Nenten polih pasayuban desa.

PAWOS 13

Sang kanorayang yening sampun eling raga indik kaiwangannya, yening arep pacang tedun makrama desa malih, patut kalugra risampune :

- ha. Puput bebawosan ring prajuru lan ring paruman nganutin tata kramaning desa.
- na. Ngaturang pejati ring Pura Desa indik jaga nguningang raga pacang nganutin awig-awig, pararem, ilikita, lan pamargin desane sane sampun kamanggehang ring paruman.
- ca. Nunas pangaksama sajeroning paruman desa, sane katuntun olih prajuru.
- ra. Patut keni pamidanda luire :
 1. Nebas kasisipan nguni.

2. Naur tulakwali lan panyagsag wirasa mawilang harga beras manut pararem.

PAWOS 14

Kepatutan Krama Desa luire :

- ha. Polih pasayuban utawi pangayom saking Prajuru lan krama desa, marep ring kasutreptian pawongannya, padruweannya lan yadnyannya.
- na. Patut kabawosin kadabdabin olih prajuru, tur suka katiwakin pamutus sahananing wicarannya.
- ca. Patut nyarengin paruman desa saha ngamargiang putusan paruman desa.
- ra. Wenang nyudi lan kasudi dados prajuru.
- ka. Kengin kalugra nyada, luput, mapawangkid, manut sulur luire :
 1. Mapawangkid sangkaning : sakit, matepetin, mayadnya, malelungayan, lan sane lianan manut pararem.
 2. Nyada sangkaning sampun wenten sane nyilidihi.
 3. Sangkaning sampun mayusa lintang ring 65 (nemdasa lima) warsa.

PAWOS 15

Kulawarga sane kengin tedun ngayahang desa luire :

- ha. Sampun deha, taruna, pinih kedik mayusa 17 (pitulas) warsa.
- na. Prajuru wenang ngerabang indik deha taruna sane antes ngayahang desa nyabran pecaruan Tilem Kasanga

PAWOS 16

- (1) Kawentenan sinoman ring Desa luire :

- ha. Sinoman arah.
- na. Sinoman wali ring Pura Kahyangan Tiga.
- ca. Sinoman aci Kesanga.
- ra. Sinoman Pangabenan.
- ka. Sinoman sekancan karya sane kasanggra olih Desa.

(2) Swadarmaning soang-soang sinoman luire :

ha. Sinoman arah :

1. Ngamargiang arah-arah, sane kapituduh olih Prajuru.
2. Luput sahananing karya ayah lanang.
3. Tan kapatut ngarauhang arah ring anak alit.
4. Yening sane patut kaarahin, kulawargan nyane tan wenten ring jero, sang mapangarah wenang ngenahang sawen maka cihna sampun ngarauhang arah-arah, indik sawen mangda nganggen carang kayu idup.
5. Ritatkala ngamargiang arah-arah patut maselempot, maka cihna ngamargiang pamargin adat.
6. Wawanengannya wantah asasih.

na. Sinoman wali ring Pura Kahyangan Tiga :

1. Masapuh sapuh ring pura.
2. Nyanggra sahananing panelas toya, ritatkala wali inucap.
3. Nyanggra sahananing pamargi, ngarereh sarana, eteh-ete upakara manut dresta.
4. Ngemit utawi nureksain ring pura, sadurung pakemit kramane rauh.
5. Polih toas kawisan manut pararem.

6. Wawanengannya selamin wali kamargiang.

ca. Sinoman aci Kasanga :

1. Nyanggra sahananing panelas toya miwah daun.
2. Nunas Tirta lan nasi tawur.
3. Masapuh sapuh lan nureksain ring bale Desa.
4. Polih toas manut pararem
5. Miwah swadarmannyane lianan manut dresta.

ra. Sinoman Pangabenan :

1. Nyanggra sahananing panelas toya.
2. Nyanggra pakaryan ring pawaregan.
3. Ngemit nureksain lan masapuh sapuh ring Bale Desa.
4. Wawanenganyane wantah arahina, yening pakaryane lintang ring arahina, sinoman wenang kagentosin.
5. Polih toas manut pararem.

ka. Sinoman sakancan karya sane kasanggra olih Desa Swadarmannya pateh sakadi sinoman pangabenan

PAWOS 17

(1) Sekaa Gong Desa :

- ha. Sekaa Gong ring desa kasudi olih krama desa sajeroning paruman Desa.
- na. Sekaa gong kapidabdabin olih Kelihan Gong, sane kasudi olih sekaa inucap.
- ca. Nyanggra sahananing karya yadnya ring desa, ring pura lan ring krama desa manut pabuat miwah dresta.

ra. Batu-batu gong, akehnya manut pararem sekaa inucap, tur kaingkupin olih krama desa.

ka. Wawanengan dados sekaa gong wantah limang masa, tur dados kasudi malih.

(2) Olih-olihan sekaa gong :

ha. Sahananing batu-batu, apah kalih ring sekaa gong, sane apah kalih ngaranjing ke desa.

na. Yening kaupahan kadura desa, upah sane ngaranjing, kalih pah tiga ring sekaa gong, apah tiga ngranjing ring desa.

ca. Luput ayah makemit rikala wali ring pura.

ra. Padgata kala krama desa tedun makarya, sekaa gong kaupahan utawi kakedegang, sekaa gong polih luput ayahan desa.

PAWOS 18

Sekaa Taruna :

ha. Sahanan anak-anaking krama desa sane sampun mayusa 15 (limolas) kantos 30 (tigang dasa) warsa tur durung alaki rabi kapatutang dados sekaa taruna.

na. Sekaa taruna patut sareng ngaremba sahananing pakaryan ring desa, manut pabuat.

PAWOS : 19

Pacalang Desa :

ha. Pacalang desa kasudi olih krama desa sajeroning paruman.

na. Wawanengan dados pacalang selami limang masa, tur dados kasudi malih.

ca. Nganutin pituduh Guru wisesa.

ra. Nyanggra kasukertan desa rauhing druwen warga desa.

ka. Polih toas manut pararem.

PAWOS 20

Ngawangun sekaa-sekaa sane siosan taler kapatutang yening sampun nganutin pituduh Guru Wisesa utawi ngajegang prawerti maagama minakadi sekaa majejaitan, kidung, miwah sane lian-lianan

PAWOS 21

Anak-anaking krama desa muah roban sane sampun patut masekolah patut kasekolahang.

PAWOS 22

Krama Desa patut nganutin pidabdab guru wisesa.

PALET 2

INDIK PRAJURU

PAWOS 23

(1) Papalihan Prajuru Desa luire :

ha. Kelihan Desa utawi Bandesa.

na. Panyarikan pinaka juru surat

ca. Patengan pinaka juru raksa

ra. Kelihan Banjar pinaka pangeling Pura.

(2) Usaha Saba Desa luire :

ha. Para Prajuru Desa.

na. Manggala Dinas ring Desa Pakraman Tabu Banjaraan.

- ca. Para Sujana Desa sanistanya apah dasa saking krama mipil sane kamanggehang ring paruman.
- ra. Prajuru sekaa-sekaa sane sampun kakukuhang ring desa.
- (3) Kerta Desa luire :
- ha. Bandesa.
- na. Manggala Dinas ring Desa Pakraman Tabu Banjaraan.
- ca. Penyarikan Desa.
- ra. Kelihan pecalang.
- ka. Kelihan sekaa-sekaa sane sampun kakukuhang ring desa.
- da. Adiri Sujana Desa sane kemanggehang ring paruman sujana desa.
- ta. Adiri krama sane kasudi olih Bandesa, sane kamanggehang uning nepasin wicara, nganutin daging awig-awig puniki.
- (4) Papalihan Kerta Desa, luire :
- ha. Pinaka Kerta luire Bandesa, Manggala Dinas ring Desa Pakraman Tabu Banjaraan, Adiri angga kerta desa sane kasudi sajeroning parumannya.
- na. Panyarikan inggih punika Panyarikan Desa.
- ca. Pangabih Kerta Desa tios ring aksara ha miwah na sane kasurat ring wiwit (3).
- (5) Swadarma Kerta Desa :
- Nepasin sahananing wicara sane tan sida kapuputang olih Prajuru Desa.

PAWOS 24

- (1) Sane kamanggehang dados Prajuru, inggih punika :

- ha. Krama ngarep ayah angkep.
 - na. Uning ring sastra, nyurat lan ngawacen.
 - ca. Uning ring sima laksana manut dresta.
 - ra. Mayusa sanistanya 40 (petangdasa) kantos 60 (nemdasa) warsa.
 - ka. Jujur tur malaksana becik.
 - da. Tan cedangga.
 - ta. Tan nahenin kanorayang antuk krama desane.
- (2) Wawanengan dados Prajuru limang masa tur kengin kasudi malih manut pararem, Sanistanya 3 sasih sadurung wawanengan Prajuru inucap pacang mararian, mangda ngaturang pakeling ring krama desa pacang ngarencanayang panyudian.
 - (3) Sadurung wenten kamanggehang Prajuru sane pacang ngentosin, Prajuru sane riin inucap manggeh ngenterang paindikan krama desane.
 - (4) Sang sampun kamanggehang dados Prajuru, mangda matur piuning ring pura Kahyangan Tiga, nunas wara nugraha ring Ida Sang Hyang Widhi sumangdane labda karya sajeroning ngamargiang swadarma.
 - (5) Pamargi inucap wiwit (4) kasangra olih Desa Pakraman.

PAWOS 25

Tata titi panyudian dados Prajuru Desa :

- ha. Kaenter olih Prajuru Desa.
- na. Tan kawenangang kasudi premangkin.
- ca. Calon Prajuru Desa soang-soang manut papalihan sanistanya kalih diri, sane kamedalang saking pikolih Usaha Saba Desa
- ra. Raris kawentenang panyudian olih Krama Desa, luire :

1. Panyudian Prajuru Desa kawentenang mapaletan manut soang-soang papalihannyane, kalaksanayang sajeroning asasih.
2. Sane nyudi wantah krama ngarep.
3. Sane polih swara pinih makueh kamanggehang dados Prajuru.
4. Yan prade wenten swara pateh katahnyane, sane mayusa duuran kamanggehang.
5. Sesampune usan panyudian tur sampun wenten Prajuru Desa sane kamanggehang, raris kawentenang pamikukuh ring desa pakraman manut Dresta lan Agama.

PAWOS 26

(1) Swadarma Prajuru Desa :

- ha. Ngawentenang Paruman Desa.
- na. Ngamel tur ngalaksanayang sadaging awig-awig, pararem miwah pamutusnya.
- ca. Ngaraksa saha nabdabin saraja brana druwen Desa.
- ra. Nuntun tur ngenterang krama desa rauhing warga desane sami, ngupadi kasukertan sakala lan niskala.
- ka. Nuntun saha ngenterang warga desa sami ngupadi nginggilang Sang Hyang Agama, kasucian Kahyangan, kasutreptian Pawongan, Palemahan, miwah tata caraning ngangge setra.
- da. Mawosin kalih niwakang pamutus marep ring wicara warga desane.
- ta. Pinaka duta Desa pacang ngawentenang temu babawos ring sang sapisira ugi.
- sa. Tata cara ngalaksanayang swadarmaning Prajuru, patut manut ring awig-awig, pararem, ilikita, pasuara miwah dresta.
- wa. Ngilikitayang pamutus paruman krama desa tur ngalaksanayang manut swadarma soang-soang.

(2) Tata titi lan Swadarma Utsaha saba Desa :

- ha. Ring sajeroning ngamargiang swadarmannyane, Utsaha Saba desa kaenterang olih Bandesa.
- na. Wawanengan Para Sujana pinaka angga Utsaha Saba desa, limang masa tur dados kasudi malih.
- ca. Swadarman utsaha Saba Desa
 - 1. Ngarincikang sakaluir pawangunan desa.
 - 2. Ngerencanayang panyudian prajuru desa.
 - 3. Paruman utsaha Sabha desa kawentenang padgata kala, manut pabuatnyane, utawi sanistane amasa apisan.

PAWOS 27

Swadarma soang – soang Prajuru Desa

ha. Bandesa :

- 1. Ngalaksanayang awig-awig sarajeg-rajeg ipun.
- 2. Ngenterang kasukertan sakala niskala.
- 3. Ngenterang aci-aci tawur kasanga
- 4. Nuntun saha nureksain saluiring upacara Yadnya ring Desa miwah pawongannya soang-soang.
- 5. Maka saksi rikalaning wenten warga desa nangun karya manut Agama, sekadi madengen-dengen, meras oka miwah sane lian-lianan.
- 6. Ngenterang sahananing wawangunan desa.
- 7. Pinaka duta Desa pacang ngawentenang temu babawos ring sapisira ugi.
- 8. Nemuang saha mutus sajeroning wicara manut awig-awig.

na. Panyarikan :

1. Nyurat saluiring pangarencana Desa .
2. Ngalaksanayang saluiring ilikita Desa.
3. Matajuhin Bandesa, yening kapialang.

ca. Patengen :

1. Ngamel utawi ngaraksa druwen desa sane marupa jinah.
2. Ngamel saha nureksain sekancan druwen desa.
3. Ngabih swadarman prajuru siosan.

ra. Kelihan Banjar pinaka pangling Pura:

1. Ngenterang pamargin upacara yadnya ring pura Kahyangan Desa.
2. Ngenterang laksana kasucian pura.
3. Nureksain saha midabdabin sahananing wawangunan lan druwen pura.

PAWOS 28

Olih-olihan Prajuru Desa luire :

- ha. Polih luput peson-peson lan urunan upakara ring pura miwah tawur kasanga sajawaning urunan wawangunan.
- na. Polih cenengan utawi towas olahan ritatkala desa molahan ngamargiang upakara
- ca. Lianan ring sane inucap ring aksara ha miwah na manut dresta lan sane kamanggehang ring paruman.

PAWOS 29

- (1) Prade wenten sinalih tunggil Prajuru Desa iwang sasanannya, miwah ngalinyokin druwen Desa tur prasida kabuktiang kaiwangannya olih krama Desa, patut keni pamidanda manut pararem.
- (2) Prajuru sane kasisipang kadi kecap ring wiwit (1), kapatutang ngawaliang druwen desa sane kalinyokang, tur kengin kausanang dados prajuru.
- (3) Mungguing swadarman prajuru sane kausanang, kamargiang olih prajuru siosan.

PAWOS 30

Prajuru Desa kagentosin majalaran antuk :

- ha. Sampun tutug sengker dados prajuru.
- na. Lampus.
- ca. Tan sida ngamargiang swadarmaning prajuru utawi kapialang abot.
- ra. Sangkaning pinunas ngaraga, sakewanten sampun kaingkupin olih krama desa sajeroning paruman.
- ka. Kausanang olih krama desa, sangkaning iwang pamargi.

PALET 3

INDIK KULKUL

PAWOS 31

Indik kawentenan kulkul ring Desa Pakraman Tabu Banjaraan inggih punika :

- ha. Kulkul Pajenengan ring Pura Kahyangan Desa.
- na. Kulkul Desa.
- ca. Kulkul ring Pura-pura.
- ra. Kulkul Sekaa-sekaa.

- (1) Kukul Desa tan wenang katepak yan tan manut ring daging awig-awig.
- (2) Tabuh tatepakan kukul Desa manut dudonan, luire :
 - ha. Tabuh tatepakan kukul upacara Dewa Yadnya ring pura, minakadi Ida Batara Tedun, lunga melasti, pacang masineb, kukul kasuarayang masangsihan alon lanang wadon.
 - na. Tabuh tatepakan kukul Krama Desa pacang tedun sakaluirnya manut dresta, kukul kasuarayang : kalih tuludan.
 - ca. Tabuh tatepakan kukul anak marabian : duang tuludan tadah gancang, kakawitin antuk tigang kelentungan ngandet, kapuputang antuk tigang kelentungan alon, kasuarayang rikala wengi.
 - ra. Tabuh tatepakan kukul warga desa lampus : negteg alon limang kelentungan.
 - ka. Tabuh tatepakan kukul wenten baya, luire :
 1. Jiwa baya, kukul kasuarayang : tigang tuludan bulus.
 2. Geni baya, kukul kasuarayang atuludan bulus kalanturang antuk klentungan negteg alon.
 3. Arta baya, raga baya, toya baya, karubuhan angin lan kayu : kukul kasuarayang duang tuludan bulus.
 4. Tabuh tatepakan kukul krama desa usan utawi puput ngamargiang patulung baya, kukul kasuarayang tigang kelentungan alon.
 - da. Sajawining wiwit (2), tabuh tatepakan kukul nganutin pamutus paruman utawi pituduh prajuru.

PAWOS 33

- (1) Kukul Desa wantah wenang katepak olih prajuru desa, sajawaning mangguh baya utawi polih wakwakan prajuru desa kengin katepak olih krama desa.
- (2) Sang nepak tan sangkaning pituduh prajuru desa, patut gelis atur supeksa ring prajuru maka tatujon panepakannya.
- (3) Prade kukul Desa katepak tan manut kadi inucap ring wiwit (1) miwah wiwit (2), sang nepak patut keni pamidanda, manut pararem.
- (4) Kukul sane siosan ring kukul desa wantah wenang katepak manut wigunannya.

PALET 4

INDIK PARUMAN

PAWOS 34

- (1) Paruman krama desa kemargiang satunggil rahina Saniscara Kliwon, nenten kamargiang arah-arah.
- (2) Paruman krama desa padgata kala, manut pabuat utawi pamargin Desa nganutin arah-arah.
- (3) Paruman Krama desa tan kapatutang pramangkin ngemanggehang kakenan-kenan : jinah pengampel, Penaub miwah sane lian-lianan sadurunge karencanayang ring paruman usaha Saba desa.
- (4) Indik pakenan kenan kengin kabaosin risampune kamargiang 3 (tigang) masa.
- (5) Kakenan-kenan inucap ngawilang harga beras sane kemanggehang ngemasa.

PAWOS 35

Tata titi Paruman :

- ha. Sang pacang ngamiletin patut mabusana Adat Madya.
- na. Tan kadadosang makta gegawan, miwah sane siosan sane ngaranayang Paruman tan arep mamargi becik.
- ca. Pangawit paruman patut ngaturang cane ring Ida Bhagawan Penyarikan, wus punika wawu kamargiang.
- ra. Paruman sida lumaksana yan sampun katedunin olih krama desa , sanistanya apah kalih ring pawilangan krama sane patut nedunin.
- ka. Nganutin pituduh Prajuru.
- da. Sahananing babawos mangda nganutin sasana manut dresta, tan kapatutang ngamedalang babawos sane tan becik, napi malih kantos ngaletihin krama desa.
- ta. Sahananing pamutus kautsahayang mangda gilik saguluk, yening tan nyidayang, suarane makehan sinanggeh pamutus.
- sa. Pamutus sane sampun kaingkupin ring paruman, wenang kanggen uger-uger gaguat tata pangenter ring desa .

PAWOS 36

Parikrama Paruman :

- ha. Kakawitin antuk panganjali.
- na. Sane pacang kabawosang mangda kakerabang dumun manut pangerencana.
- ca. Babawose mangda nganutin parikrama.
- ra. Bebawosan sejawaning parencana, kengin kemargiang sapuput pangerencana inucap.
- ka. Kapuputang antuk ngaturang parama santi

PAWOS 37

- (1) Pamutus sane nenten kailikitayang kawastanin pakerab, luire : pacang gotong-royong miwah sane siosan.
- (2) Pamutus sane kasurat mawasta ilikita utawi pasuara.
- (3) Pamutus inucap ring wiwit (1) miwah wiwit (2) sinanggeh sepat siku-siku, patut katinutin olih warga desa sami.

PAWOS 38

Prade wenten sinalih tunggil krama desa nenten nganutin tata titi paruman patut keni pamidanda manut pararem.

PALET 5

INDIK DRUWEN DESA

PAWOS 39

Druwen Desa Pakraman Tabu Banjaraan luire :

- ha. Pura Kahyangan Tiga, Padmasana, Melanting lan Bale Patok.
- na. Bale Desa lan telajakannya.
- ca. Tanah carik asikut.
- ra. Tanah Setra.
- ka. Tanah margi lan rurung.
- da. Tanah Pekarangan Sekolah.
- ta. LPD
- sa. Miwah druwen desa siosan sane kamanggehang manut wiwitannyane.

PAWOS 40

- (1) Sahananing krama desa wenang pratyaksa ring druwen desa sami.
- (2) Prade wenten druwen desa miwah peson-peson krama sane ical, sang sapisira sane mamandung wenang keni pamidanda manut pararem, saha ngawaliang papandangan inucap.
- (3) Prade wenten druwen desa miwah peson-peson krama ical, nanging tan kakeniang utawi tan wenten ngangken ngambil, patut kawentenang pa Dewa Saksian manut pasuara.
- (4) Prade wenten warga desa polih nuduk arta brana mabuat ring wawidangan desa, mangda atur upeksa ring prajuru desa.

PAWOS 41

Sekancan druwen Desa wigunan ipun kaenterang olih prajuru desa, ngardi kasukertan desa, luire : Pangaci ring kahyangan desa, miwah gaguat siosan.

PAWOS 42

Indik pamiara druwen Desa :

Sakancan druwen Desa patut kapiara antuk krama desa luire :

- ha. Pura-pura kahyangan desa, Padmasana, Melanting lan Bale Patok.
- na. Bale Desa.
- ca. Margi lan rurung.
- ra. Pancoran.
- ka. Setra.
- da. Miwah sane lianan, manut dresta.

PAWOS 43

Tata-titi ngangge setra :

- ha. Prade wenten wong mendem ring setra Desa Pakraman Tabu Banjaraan, tan kalugra ngangge gagumuk semen utawi babetonan.
- na. Sejawaning wong maagama Hindu, tan kalugra mendem ring setra Desa Pakraman Tabu Banjaraan.

PALET 6

SUKERTA PAMITEGEP

KAPING 1

INDIK KARANG, TEGAL LAN CARIK

PAWOS 44

- (1) Sahananing pawilangan karang, tegal lan carik, kapidabdabin luire :
 - ha. Wenten wates ipun.
 - na. Mapemedal kamargine utawi karurunge, tan wenang kabebeng.
 - ca. Prade wenten karang, tegal lan carik kabebeng, patut kawehin margi, manut patiwak prajuru.
 - ra. Wenang kawehin sombah panguwus toya.
 - ka. Sahananing karang, tegal lan carik, patut kapidabdabin mangda maguna marep sang nrebenang saha tan ngawinang kaduhkitan anak lianan.
- (2) Wates karang patut nganggen tembok utawi pagehan, wates sane kaler, kangin lan sane namping rurung kadruwe tur kakaryanin olih sang ngalinggihin karang inucap.
- (3) Prade wenten karang camput utawi tan wenten ngwaris patut kadruwe antuk Desa.

- (4) Karang inucap manut wiwit (3) patut katiwakang ring krama sane tan maduwe karang, kapidabdabin manut pararem.
- (5) Prade pacang makarya kandang wawalungan, miwah genah majemuhan busana tan kapatutang ngelintangin karang anak sios, semaliha tan kapatutang majemuhan ring margine miwah ring Bale Desa.
- (6) Tan kapatut nglahlah tanah pekarangan, tegal lan carik druwen anak sios, napi malih sane kadruwe antuk Desa, minakadi linggih Pura-pura, setra, margi miwah sane siosan.
- (7) Prade wenten krama desa malaksana kadi wiwit (6), wenang katiwakin pamatut luire :
 - ha. Ngawaliang tanah sane kalahlah.
 - Na. Ngawehin prabeya kadi patut saha mapahayu.
- (8) Telajakan karang patut kapiara, katandurin mangda ngamedalang wiguna lan kaasrian wawidangan.

KAPING 2
INDIK KAKAYONAN
PAWOS 45

- (1) Krama sane pacang nandur tanem tuwuh, nampek ring genah Kahyangan wyadin paumahan, paembangannyane saking panyengker, sanistannya 3 (tigang) depa agung.
- (2) Kekayonan sane kapitahen ngarawuhang baya ring anak sios luire : ngungkulin, akah ipun ngarusak tembok panyengker wiadin wawangunan, kekayonan punika kengin katundung.

- (3) Prade sang madruwe kakayonan tan nyuken nundung, sang pacang nundung patut atur supeksa ring Prajuru mangda kapidabdabin tur kaicen pamutus. Prade sampun kapatutang kakayonan punika katundung, nanging sang madruwe taler tan nyuken, riwekas yening kakayonan punika ngarubuhin, kapatut sang madruwe kakayonan punika mecikang kadi nguni tur ngupakarain manut Agama Hindu.
- (4) Prade wenten warga ngebah taru, mawasta ngarubuhin pakarangan utawi pepayonan anak sewos, kapatut sang ngebah sareng sang mapituduh mecikang wyadin ngupakarain manut Agama Hindu.
- (5) Prade wenten taru pungkut ke karang anak sios, tan ngawetuang baya, sane madruwe karang punika patut malungguhang arep ring madruwe taru punika, mangda gelis kagingsirang. Prade tan karunguang kantos tigang rahina wit malungguhang, taru punika wenang kataban.
- (6) Prade wenten tetanduran, entikan ipun ngalimbak ke karang, tegal, carik anak sios, wenang kataban antuk sang madruwe karang, tegal lan carik sane kaungsi olih entikan punika.

KAPING 3

INDIK WAWANGUNAN

PAWOS 46

- (1) Sahananing warga Desa tan kapatutang makarya wawangunan nyapcap ka pekarangan anak sios.
- (2) Prade wenten karang kabebeng patut kawehin rurung adepa alit.
- (3) Tan kapatut ngenahang barang ring margi lintangan ring tigang rahina,
- (4) Tan wenang makarya wawangunan ring sakuwub margi.

- (5) Kakayonan sane naonin margi kengin kateteb.
- (6) Margi utawi rurung patut kapiara olih krama desa manut telanjakan karang paumahan soang-soang.
- (7) Sios ring kecap wiwit (1), (2), (3), (4), (5) lan (6), kapidabdabin manut dresta.

KAPING 4
INDIK WAWALUNGAN
PAWOS 47

- (1) Sahanan warga Desa sane miara wawalungan patut sayaga nureksain, luire :
negul, malengbeng mangdane tan ngarusakin karang, tegal lan carik anak sios,
napi malih kantos ngaletihin Kahyangan.
- (2) Prade wenten wawalungan kantos ngarusakin pabianan lan sane siosan
risampune polih kapelungguhang, patut kataban raris katur upeksa ring prajuru,
sang nruwenang patut keni pamidanda manut pararem, tur naur panebas sane
karusakang.
- (3) Prade ngaletihin kahyangan, patut keni pamidanda pangupakara Kahyangan
inucap manut Agama Hindu. .
- (4) Tan wenang ngangon wawalungan ring genah-genah sekadi :
ha. Genah-genah Suci.
na. Margi ageng lan rurung.
Ca. Setra.
- (5) Prade wenten tan tinut kadi inucap ring wiwit (4) patut keni pamidanda manut
pararem.

KAPING 5

INDIK BAYA LAN DUSTA

PAWOS 48

Sahanan laksana sane tan rahayu sane mawasana ngawinang pikobet, duhkita, duskerta, ring anak sios sinanggeh baya, sang lumaksana baya sinanggeh dusta.

PAWOS 49

- (1) Prade wenten warga desa sane katiben baya, mangda gelis atur upeksa ring prajuru utawi ring sang wenang mawosin.
- (2) Sahananing krama desa sane uning wenten jadma malaksana dusta, patut gelis atur upeksa ring prajuru.
- (3) Sahananing warga desa patut sayaga mapitulung ring warga sane keni baya.
- (4) Sang sane kabuktiang malaksana dusta, patut keni pamidanda manut Pararem tur katur ring Guru Wisesa.

PAWOS 50

- (1) Warga desa sane katiban kamalingan, patut gelis atur upeksa ring prajuru, prade pacang maseserep , patut nunas panguwak ring Prajuru Desa lan Dinas.
- (2) Prajuru Desa patut nuntun mangda tingkahe maseserep manut awig-awig wiadin sasana.
- (3) Sane kabuktiang malaksana dusta, patut keni pamidanda manut pararem.

PAWOS 51

- (1) Prade wenten warga desa sane kapelegandang utawi kaparikosa, wicara punika patut pramangkin katur supeksa ring prajuru.

- (2) Prajuru patut di gelis midabdabin, prade prasida kabuktiang, sang lumaksana patut keni pamidanda manut pararem, saha atur supeksa ring Guru Wisesa.

PAWOS 52

- (1) Indik Geni baya :

ha. Prade wenten warga katiben geni baya, patut polih pitulung saking warga desa.

na. Prajuru patut midabdabin geni baya punika ngantos puput.

ca. Prade geni baya punika pakardin dusta tur sida kabuktiang, sang lumaksana patut keni pamidanda manut pararem saha atur supeksa ring Guru Wisesa.

- (2) Indik Toya baya :

Prade wenten warga katiben toya baya, patut polih pitulung saking warga desa.

PAWOS 53

- (1) Sapa sira ugi kabuktiang manut Tri Pramana, ngarusak utawi mamaling barang sane kasinanggeh suci, patut keni pamidanda manut pararem, miwah ngawaliang utawi mecikang tur pangaskara manut Agama Hindu, saha atur supeksa ring Guru Wisesa..

- (2) Prade wenten jadma nguman-uman, wak parusia, wak capala, kroda mayuda ring pura, patut keni pamidanda manut pararem, kengin katur ring Guru Wisesa.

- (3) Sang malaksana dura cara ring Agama, prade kabuktiang patut keni pamidanda manut pararem.

KAPING 6
PANYANGGRAN DESA
PAWOS 54

- (1) Sajeroning krama ngewangun karya ayu, kengin polih panyanggra krama desa, manut pinunas sang mayadnya utawi manut dresta.
- (2) Sang adruwe karya patut ngaturang panyanggra ring krama desa saka sidan manut dresta.
- (3) Prade karya punika marupa karya Pitra Yadnya, patut karemba olih krama desa manut awig-awig lan dresta.

CATURTAS SARGAH
SUKERTA TATA AGAMA

PALET 1
DEWA YADNYA
PAWOS 55

- (1) Pura - pura sane wenten ring wawidangan Desa Pakraman Tabu Banjaraan luire :
 - ha. Pura Kahyangan Tiga, Padmasana, Melanting lan Bale Patok.
 - na. Pura Kahyangan, Pura Pedadian, lan Pura Paibon luire :
 1. Pura Dalem Keramas.
 2. Pura Dalem Tampuagan.
 3. Pura Batu Madeg.
 4. Pura Dadia Pasek Gelgel.
 5. Pura-pura Paibon Warga Pasek Gelgel.
 6. Pura-pura Dadia lan Paibon Warga Pulasari.

7. Pura-pura Dadia lan Paibon Warga Pande.
 8. Pura Dadia lan Paibon Arya
 9. Pura Ulun Carik.
- (2) Pangemong lan pangempon pura-pura manut wiwit (1) luire :
- ha. Pura Kahyangan Tiga, Padmasana, Melanting lan Bale Patok olih krama Desa.
 - na. Pura-pura Kahyangan, Pura Pedadian lan Paibon, olih pangemong lan pangempon sowang-sowang manut sakadi Purana Pura inucap.

PAWOS 56

- (1) Ring sowang-sowang pura Kahyangan Desa, wenang kawentenang Pamangku sane pacang nuntun utawi ngastawayang sahananing yadnya ring pura-pura inucap.
- (2) Pidabdab ngadegang Pamangku Kahyangan Desa luire :
 - ha. Kengin mawiwit saking nyanjan.
 - na. Mawiwit saking sasudian tur kasungkemin olih krama desa.
- (3) Sang cedangga utawi Sang amungpang paraning laku tan wenang dados Pamangku
- (4) Pawintenannyane kasanggra olih Desa lan kapuputang olih Ida Sang Sulinggih
- (5) Prade sampun kawintenin wenang ngarangsuk gagelaran pamangku, patut kapingsingih manut wigunannyane ngamargiang swadharmaning pamangku, tur tan ngalempasin sastra Agama.

PAWOS 57

Swadharmaning Pamangku luire :

- ha. Asewaka dharma astiti bakti ring Ida Sang Hyang Widhi.
- na. Ngenterang wiadin ngastawayang sahanan upakara yadnya ring pura lan ring Desa manut dresta.
- ca. Nuntun krama desa mangda satata astiti bakti ring Ida Sang Hyang Widhi, manut kecaping Agama.
- da. Pamangku istri kawenang ngenterang upacara - upakara ring Pura lan ring Desa.
- ta. Pamangku sane sajeroning wicara, tan wenang muputang upacara yadnya.

PAWOS 58

- (1) Ritatkala Pamangku muputang upacara yadnya ring pura Kahyangan Desa patut karemba olih para pamangku pangremba, tur patut niwakang pituduh ring pamangku pangeremba inucap.
- (2) Prade pamangku sane marep kapihalang, upacara yadnyane patut kamargiang utawi kapuputang olih pamangku desa siosan.
- (3) Prade wenten pamangku keni ujar ala, ulah ala, pamangku inucap patut kaprayascita manut Agama, sang maweh ujar ala, ulah ala inucap patut keni pamidanda, manut pararem.
- (4) Prade wenten pamangku kabuktiang amungpang paraning laku tan wenang kasepuh tur kausanang dados pamangku.
- (5) Sadurung pamangku kausanang sekadi wiwit (4), patut kapidabdabin rihin olih prajuru desa.

PAWOS 59

Olih-olihan pamangku desa luire :

- ha. Luput sahananing ayah-ayahan desa.

- na. Luput peson-peson lan urunan upakara yadnya.
- ca. Polih cenengan lan pah-pahan sesari manut pararem.
- ra. Polih busana arangsukan sanistanyane ngemasa rikala aci pacaruan Tilem Kasanga.
- ka. Pitra yadnyannyane riwekas kasanggra olih Desa, prade sampun polih uwak-uwakan saking sentanannyane.

PAWOS 60

Ngentosin pamangku mawiwit sangkaning :

- ha. Pamangku seda.
- na. Keni panyungkan rahat sane tan prasida waras malih.
- ca. Kausanang olih krama desa, sangkaning kabuktiang manut Tri Pramana malaksana dusta.

PAWOS 61

Aci-aci lan piodalan ring Pura Kahyangan Desa luire :

- (1) Piodalan ring pura-pura sane kaemong lan kaempon olih krama desa luire :
 - ha. Pura Puseh, nemonin Buda Umanis wara Medangsia.
 - na. Pura Dalem, nemonin Anggara Keliwon wara Prangbakat.
 - ca. Padmasana, Melanting lan Bale Patok nemonin Purnama Kasa.
- (2) Tata cara pamargi upacara upakara yadnya sane kabawos ring wiwit (1), kamargiang manut palelutuk ring soang-soang pura inucap.

PAWOS 62

Kasucian Kahyangan :

- (1) Sahananing warga desa patut nureksain raga, ngupadi kasucian Kahyangan.
- (2) Sane tan wenang ngaranjing ring pura utawi ring genah-genah suci luire :
 - ha. Sang kasinanggeh cuntaka utawi kelampusan miwah sebel luire : ngeraja, ngembasang putra, karuron, nyambut karya pitra yadnya, pangantenan durung kaupakara, miwah sane siosan manut dresta.
 - na. Sang kasinanggeh candala sadurung kaprayascita luire : panak babinjat, beling tan wenten ngangkenin, jadma buduh, mamitra ngalang, sakit ila lan sakancan candala siosan manut dresta.
 - ca. Mabusana sane tan patut manut tata susila lan agama.
 - ra. Sang makta barang sane kasinanggeh leteh manut agama.
- (3) Pratingkah lan laksana sane tan kapatut ring pura luire :
 - ha. Masumpah utawi macoran, sajawaning pituduh prajuru.
 - na. Maujar ala, maulah ala lan wak parusia.
 - ca. Mawiadi napi malih kantos medal rah, makabotan lan mawarih.
 - ra. Makolem lanang istri masikian, mecikang wastra, mecikang papusung, macecepin rare, miwah sane siosan sane tan manut ring agama.
 - ka. Mangan kinum kantos ketaluan lan sahananing jajuden.
- (4) Sengker cuntaka lan sebel luire :
 - ha. Kalampusan, ngawit saking nyuaraang kulkul cihna kalampusan ngantos 3 (tigang) rahina saking kapendem.
 - na. Karya pitra yadnya, ngawit saking nunas atma kantos upacara tigang rahina utawi ngetelunin.

- ca. Keruron, sane istri 42 (petang dasa kalih) rahina ngawit saking keruron, yan sane lanang 11 (solas) rahina.
 - ra. Ngraja, salamin ngeraja kantos mersihin raga.
 - da. Ngembasang putra, 42 (petang dasa kalih) rahina ngawit saking embas, kantos maupakara akambuhan, yan sane lanang akepus odel.
 - ta. Ritatkala nyambut karya ring pura desa, pura dadia lan paibon, sane keni cuntaka wantah sang ngarepin kewanten.
 - sa. Prade wenten rare lampus sadurung akambuhan patut kapendem pramangkin tur mangda sasiliban samaliha krama desa tan keni cuntaka.
- (5) Prade wenten krama mamurug wiwit (4) wenang keni pamindanda manut pararem.
- (6) Sane tan keni cuntaka luire :
- ha. Ida Sang Sulinggih.
 - na. Para Pamangku Kahyangan desa, dadia miwah paibon.
- (7) Prade wenten Kahyangan keni kadurmanggalaan luire : karubuhan, kasiratan rudira, kahanan wangke sato ageng, wangken manusa, sahananing lulut lan simbar, patut pamangku digelis nyadokang ring prajuru, mangda marumang krama desa, pacang ngawentenang upakara sapatutnyane, manut panugrahan Ida Sang Sulinggih.
- (8) Prade wenten warga desa karauhan ring pura, patut kapidabdabin olih prajuru tur kengin kapintonin manut kecaping sastra lan agama.
- (9) Prade wenten warga edan kantos ngarusak ring pura, waris utawi kapatutnyane, patut mecikang sahananing sane karusak lan mrayascjta manut agama.
- (10) Ritatkala upacara yadnya ring Kahyangan, mangda kautsahayang madaging wawalen sanistanyane kakidungan.

PAWOS 63

Tata-titi ngaranjing ring Pura utawi ring genah-genah suci :

- ha. Prade pacang ngayah ring pura kapatut ngangge busana adat sanistanyane masasenteng.
- na. Prade pacang ngaturang bakti patut mabusana adat madya.
- ca. Soang-soang krama patut nitenin raga indik kasucian pura.
- ra. Anak alit sadurung tigang sasih tan dados kasarengang ngaranjing kapura.

PALET 2

RSI YADNYA

PAWOS 64

Ida sang sulinggih patut kapinggih olih krama desa , luire :

- ha. Pinaka panuntun warga desa indik tatwa lan agama.
- na. Muputang upacara - upakara yadnya ring Kahyangan lan ring krama desa.
- ca. Wenang niwakang pangaskara ring krama desa.
- ka. Prade kanton sajeroning wicara tan kapatutang muputang upakara yadnya

PAWOS 65

- (1) Prajuru patut nuntun krama desa misinggihang sang sulinggih, para pamangku, lan sang sujana sami manut linggih.
- (2) Krama desa patut ngaturang punia ring Ida Sang Sulinggih riwus muput Yadnya.
- (3) Krama desa patut mateleb ring Ida Sang Sulinggih, muah sang sujana sane prasida mawesana kasutreptianing desa, manut kecaping Agama.
- (4) Krama desa patut ngaturang punia lan ayah ritatkala Ida Sang Sulinggih madruwe karya.

PAWOS 66

Prajuru patut nuntun krama desa mangda pratyaksa nitenin pamargin yadnya mangda nenten lempas ring kecaping agama

PAWOS 67

- (1) Prade wenten krama desa sane pacang madwijati, sadurunge patut polih panugrahan saking Ida Sang nabe, utawi panugrahan saking Parisada Hindu Dharma Indonesia lan Guru Wisesa, maka cihna sang pacang madwijati inucap sampun wus katitenin, indik pangaweruh lan pawongannyane tan ngalempasin kecap sastra agama, dresta lan sasana sane pacang kamargiang.
- (2) Prajuru patut nureksain kawentenannyane, laksana sang madwijati mangda jati tan lempas ring kecaping agama.
- (3) Risampun puput upakarannyane tur nabèn ida sang madwijati sampun mapaica parab, prajuru patut nyobiahang ring krama desa.
- (4) Tatiwak sang nabe sane sampun kakukuhang olih sang rumawos, pinaka pamutus sane pinih pastika.
- (5) Prade wenten sane tan manut napi malih nyasar laku, nabennya patut katunasin pamutus sane patut.
- (6) Sang mawinten sane pacang ngamargiang nyonteng, nalang miwah sane lianan manut agama, prajuru patut nyaksiang upacara pawintenannyane tur patut nyobiahang ring krama indik tatujon pamargin sang inucap ring sajeroning paruman.

PALET 3
PITRA YADNYA
PAWOS 68

- (1) Sahananing upacara upakara pamretea sawa kabaos Pitra Yadnya, minakadi : mabersih, mendem, ngeseng lan ngaben .
- (2) Mendem utawi ngeseng sawa :
 - ha. Genah mendem, ngeseng ring setra ugi.
 - na. Ida Sang Sulinggih polih linggih manut dresta.
 - ca. Padewasan mendem, ngeseng miwah ngaben, kapidabdabin manut awig-awig miwah panugrahan Ida Sang Sulinggih.
 - ra. Mendem, ngeseng miwah ngaben tan kalugra nemonin : pasah, semut sadulur, kala gotongan, purnama, tilem, anggarkasih, buda wage, buda kliwon, miwah tumpek.
 - ka. Prade sang kalampusan kawentenannyane kobet, kalugra makingsan premangkin, sasampune polih wak wakan saking prajuru, pamargine sasiliban, tan nyuarayang kulkul, tan maupakara, tan maprakpak, tur tan ngangge gagumuk.
 - da. Prade wenten kalampusan nemonin wali ring Kahyangan, pamargine mendem mangda sampun puput ngaturang wali.
 - ta. Prade sang lampus durung ketus untu, mungguing pratekannyane tan ngangge papaga.

PAWOS 69

- (1) Prade wenten sang lampus sangkaning salah pati, ulah pati, kengin kabakta budal tur kasanggra antuk banten pangulap lan panebas, mungguing upakara pretekannyane, nganutin panugrahan Ida Sang Sulinggih.
- (2) Tan wenang mendem sawa sane kantun ngadut bobotan.
- (3) Prade wenten sang lampus ring carik utawi tegalan, sang madruwe kapatutan utawi warisnyane, patut ngaturang upacara upakara pamrayascita lan pacaruan panca sata, kalaksanayang ring genah inucap, sasampune tigang rahina wus kapedem.
- (4) Prade sang lampus inucap tan keni elingin, wenang katur ring Guru Wisesa, upacara upakara pamrayascitannyane kalaksanayang olih Desa utawi subak.
- (5) Prade sang lampus inucap wenten ngangkenin, sang ngangkenin patut ngaturang upacara upakara pamrayascitannyane.

PAWOS 70

- (1) Prade wenten jatma dura desa pacang mendem ring setra Desa Pakraman Tabu Banjaraan, sajroning magama Hindu kapatut :
 - ha. Sadurunge patut atur supeksa ring prajuru, nunas wak-wakan pamargi inucap.
 - na. Keni jinah pananjung batu, mawilang harga beras manut pararem.
 - ca. Tan polih panyanggran krama desa.
- (2) Prade wenten jatma dura desa pacang kaabenang ring setra Desa Pakraman Tabu Banjaraan, kapatut :

- ha. Sadurunge patut atur supeksa ring prajuru, nunas wak-wakan pamargi inucap.
 - na. Keni jinah pananjung batu mawilang harga beras manut pararem
 - ca. Keni pamrayascita lan pacaruan ring Desa pakraman manut dresta
 - ra. Tan polih panyanggra saking krama desa.
- (3) Prajuru Desa patut marumang krama desa indik pemargi wiwit (1) miwah wiwit (2).

PAWOS 71

Swadarmaning krama desa ritatkala kalampusan :

- ha. Sang kalampusan patut digelis atur supeksa ring prajuru, pacang nunas tatimbang ring tatujon pamargine.
- na. Prajuru maritetes pamargin sang kalampusan, manut kawentenannyane tur nyuarayang kulkul.
- ca. Krama desa patut sayaga nedunin tur ngaremba sahananing karya sang kalampusan manut dresta.

PAWOS 72

Tata-titi nganter sawa ka setra :

- ha. Mungguing runtutan pamargine saking ajeng :
Upakara, sawa, wadah utawi pamereman, kidung kakawin, para istri-istri, pinih unkur lanang-lanang lan tetangguran gong, kelentangan.
- na. Pamargine mangda dabdab trepti, tan kawenangang ngarap, napi malih kantos ngarusak wadah utawi pamereman, sawa miwah sane lianan kantos ngawetuang pakeweh ring sang mayadnya. Prade wenten krama desa mamurug , wenang keni pamidanda manut pararem.
- ra. Sahanan krama desa sane ngamiletin patut mabusana adat madya.

PAWOS 73

Tata cara ngangge setra :

- ha. Nganutin pituduh prajuru miwah dresta.
- na. Warga desane patut nitenin mangda sahananing leteh setrane nenten ngalahlah, ka wawidangan desa napi malih ka genah-genah sane suci.
- ca. Prade pangabenan, ngagah sawa patut nganutin awig-awig miwah panugrahan Ida Sang Sulinggih.

PAWOS 74

(1) Papatusan wenten tigang soroh luire :

ha. Patus dadakan alit :

1. Krama desa ngamadalin beras manut pararem.
2. Kasikiang ring bale desa olih prajuru.
3. Ngaremba karya : makarya pangosongan utawi pepaga, miwah ngater sawa ka setra.

na. Patus dadakan ageng :

1. Krama desa medal ajengan apunjung.
2. Nyanggra karya ngantos puput, manut dresta.
3. Ring pangutangannyane krama desa lanang istri patut polih linggih apisan.

ha. Patus masa :

1. Krama desa medal patus luire : ajengan apunjung, tiing akatih lan kelangsah akuub.
2. Nyanggra karya ngantos puput manut dresta.

3. Ring pangutangannyane krama desa lanang istri patut polih linggih apisan.
- (2) Patus dadakan alit kapaica ring krama desa sane kalampusan, sajawining sang lampus durung maketus.
- (3) Patus dadakan ageng kapaica ring krama desa sane ngaben dadakan.
- (4) Patus masa kapaica ring krama desa sane ngaben masa.
- (5) Sanistannyane 21 (selikur) rahina sadurung pangabenan masa, mangda sampun puput babawosan ring Prajuru lan ring paruman desa indik pidabdab pangabenan sajangkepnyane.

PALET 4

INDIK MANUSA YADNYA

PAWOS 75

- (1) Manusa yadnya inggih punika upacara upakara darmaning manusa ngawit saking jeroning garba wasaning ibu, ngantos pawiwahan luire :
 - ha. Magedong-gedongan
 - na. Wawu embas
 - ca. Kepus odel
 - ra. Ngalepas aon
 - ka. Tutug kambuhan
 - da. Nelu bulanin
 - ta. Aweton
 - sa. Tumbuh gigi
 - wa. Mapetik rambut

- la. Maketus gigi
 - ma. Mungguh deha-teruna
 - ga. Mapandes
 - ba. Pawiwahan
- (2) Upacara upakara inucap ring wiwit (1) nganutin kecaping agama : kanista, madya, utama.

PAWOS 76

- (1) Sahananing sang alaki rabi kapatut ;
- ha. Kaupakara sanistanyane pabia kalaan.
 - na. Upacara upakara inucap kasaksinin olih Bandesa lan Manggala dinas.
- (2) Sadurung ngalaksanayang upacara upakara kadi wiwit (1) tan kalugra ngaranjing ka pura utawi ring genah-genah suci.
- (3) Upacara upakara kadi wiwit (1) kapuputang olih pamangku utawi Ida Sang Sulinggih.

PALET 5

INDIK BHUTA YADNYA

PAWOS 77

Buta yadnya inggih punika : Sahananing upacara upakara sane matetujon nyomia wiadin nyuciang buta kala durga bucaru menados buta kala durga hita luire :

- ha. Upakara pabya kalaan sarwa tumuwuh ring Tumpek Wariga, sarwa prani ring Tumpek Uye.

- na. Upakara pabya kalaan ring pretiwi kabawos macaru luire :
1. Yadnya sesa
 2. Eka sata, manca sata, manca kelud, rsi ghana, manca sanak lan malik sumpah.
- ca. Caru Tilem kasanga kawentenang ring pempatan desa, ageng caru manca sata, saha nunas tirta lan nasi tawur ring tawur kasanga Kabupaten Klungkung, kemargiang manut pituduh guru wisesa lan Parisada Hindu Darma Indonesia.
- ra. Sajawaning munggah ring aksara ha, na, ca, malih pabya kalaan marep ring manusa manut pabuat.

PAWOS 78

- (1) Tawur kasanga, patut kalaksanayang kadi ring sor luire :
- ha. Melasti.
- na. Pecaruan, sakadi kecap pawos 77 aksara ca.
- ca. Ring soang-soang paumahan, nganutin pituduh saking Guru Wisesa lan Parisada Hindu Darma Indonesia.
- ra. Pangerupakan, kapidabdabin olih prajuru lan pacalang.
- ka. Panyepian, patut ngamargiang catur brata panyepian, minakadi : Amati gni, Amati karya, Amati lelungan, miwah Amati lalungan.
- da. Pamargin catur brata panyepian , kapidabdabin olih prajuru lan pacalang.
- ta. Sane mamurug catur brata panyepian patut keni pamidanda manut pararem.
- sa. Wus ngemargiang catur brata panyepian, kautsahayang ngawentenang Dharma Santhi.

PANCAMAS SARGAH
SUKERTA TATA PAWONGAN

PALET 1

INDIK PAWIWAHAN

PAWOS 79

(1) Pawiwahan inggih punika :

Panunggalan purusa lan pradana malarapan antuk panunggalan sukacita kadulurin antuk upakara miwah upasaksi skala lan niskala.

(2) Pidabdab pawiwahan ring Desa Pakraman Tabu Banjaraan ngamanggehang pamargin purusa. Patut sang purusa sane ngalap rabi tur kapaumahang ring sang purusa.

(3) Pamargin pawiwahan wenten palih-palihan ipun :

ha. Papadikan, kamanggala olih pakrunan.

na. Ngerangkat utawi ngerorod, pamargine sasiliban, wus punika wawu kapalepehang, kapalakuang.

ca. Nyeburin, sang wadon manggeh purusa, kamanggehang dados sentana olih keluargannyane, sane lanang manggeh pradana.

(4) Pidabdab sang pacang mawiwaha luire :

ha. Sampun munggah deha taruna.

na. Sangkaning suka cita lan tan kaparikosa.

ca. Prade ngambil sios agama, patut karihinin antuk sudhi wadani.

ra. Nganutin awig-awig lan kecap agama.

ka. Mangda anut ring daging Undang-undang Perkawinan sane kemanggehang olih guru wisesa.

(5) Sang mamurug kecaping wiwit (4), keni pamidanda manut pararem.

PAWOS 80

Tata caraning pawiwahan luire :

ha. Pamargin papadikan :

1. Ngedih ping kalih, ring ping tigane pangambilan.
2. Ring pangambilane, keluarga sang pradana ngarahang Kelihan Desa pakraman, Penarikan miwah Manggala Dinas, pinaka saksi.
3. Risampune pangambilan, ring wengine Prajuru Desa nyuarayang kukul kalanturang pakerab ring krama desa indik pawiwahan inucap.

na. Ngerangkat utawi ngerorod, pidabdab sang purusa luire :

1. Masedek utawi majatiang, katuntun olih prajuru, tan kasep ring awengi.
2. Ngawentenang pangelukuan sanistanyane ping kalih, manut tata cara saha sulurannyane.
3. Prade sampun manut palakune katampi, kabaos puput, keluarga sang predana patut atur upeksa ring Kelihan Desa nunas suaran kukul kadulurin pakerab ring krama desa maka cihna pawiwahan inucap.
4. Prade sampun mamargi ping kalih palakune, taler durung katampi utawi kapuputang olih keluarga sang predana, keluarga sang purusa wenang atur upeksa ring Kelihan Desa lan Manggala Dinas nunas pamargi mangda sida puput.
5. Kelihan Desa lan Manggala Dinas patut nitenin pamargi inucap ring wilangan 4. Prade jati pamargine sampun manut ring awig-awig, Kelihan Desa patut ngicen pamutus pemargi inucap saha ngerabang ring paruman.

ca. Pamargin nyeburin :

1. Sane istri kemanggehang pinaka purusa, sane lanang manggeh pradana.

2. Sentana purusa silidihi tan kalugra nyeburin.
3. Sadurung pidabdab nyeburin kalaksanayang, kulawarga istri sane pacang kaceburin patut atur upeksa ring kelihan desa, nunas mangda kapidabdabin tur risampune puput mangda kakerabang ring paruman.

PAWOS 81

- (1) Tan kalugra ngamargiang upacara upakara Pati Wangi.
- (2) Ageng panaur suaran kulkul mawilang harga beras manut pararem.
- (3) Suaran kulkul kataur olih kulawarga sang predana.
- (4) Prade palakune tan katampi olih kulawargan sang predana kadi kecap ring pawos 80 aksara na wilangan 4 lan wilangan 5, kulawarga purusa patut naur suaran kulkul manut pararem.

PAWOS 82

- (1) Sang kaicalan anak istri, prade sajeroning awengi durung wenten sane majatiang, patut atur upeksa ring Bandesa lan Manggala Dinas nunas pitulung pacang maseserep.
 - ha. Kaenter olih prajuru.
 - na. Sang maseserep tan dados langkungan ring kalih diri ngaranjing kapahumahan anak sios.
 - ca. Sang maseserep tan dados makta gegawan utawi sanjata, sawawaning pacalang utawi patugas saking Guru Wisesa.
 - ra. Sang maseserep tan kapatut ngamedalang babaos sane tan nganutin tata susila.
- (3) Prade pamargine maseserep tan nganutin kecap wiwit (2), tan kalugra pacang maseserep.

PAWOS 83

- (1) Sang lanang kautsahayang mangda marabi asiki, sawawaning wenten pasubayan, kawehin antuk rabine pinih rihin tur manut pidabdab sang wenang rumawos.
- (2) Prade wenten anak istri deha mobot, kulawargan nyane patut digelis nyadokang ring Kelihan Desa, mangda digelis majangkepan ring sang mobotin.
- (3) Prade sang kapituduh mobotin tan arep ngambil, sakewanten ngangken mobotin, patut keni pamidanda luire :
 - ha. Ngusak-asik desa, danda manut pararem.
 - na. Pamrayascita Desa.
 - ca. Wicara inucap patut katur ring Guru Wisesa.
- (4) Prade sang ngangken mobotin lintangan ring adiri, sang ngangken mobotin patut keni pamidanda pateh kadi wiwit (3).
- (5) Prade tan wenten sane ngangkenin mobotin, sane mobot utawi kulawargan nyane patut :
 - ha. Marayascita Desa.
 - na. Upacara upakara pamerasan miwah marayascita raga.
 - ca. Ngupakara rarene manut Agama.
- (6) Prade sang kapituduh nenten ngangken mobotin, patut ma Dewa Saksian, pidabdabnyane luire :
 - ha. Banten padewa saksi kamedalang olih sang mobot.
 - na. Wus ma Dewa Saksian kengin nunasang ring Guru Wisesa.
- (7) Prade ring Guru Wisesa, sang kapituduh ngangken mobotin, kautsahayang mangda majangkepan, tur keni pamidanda :
 - ha. Marayascita Desa.

- na. Kasinanggeh nganten wit saking wicara.
- ca. Miwah pamidanda manut pararem.

PAWOS 84

Prade wenten warga desa, malaksana lokika sanggraha, mitra ngalang, gamia gamana, salah timpal patut katitenin tur kabaosin olih prajuru lan manggala dinas. Prade jati tur kabuktiang, kabaos Angusak-asik Desa patut keni pamidanda luire :

- ha. Marayascita Desa
- na. Marayascita raga manut agama
- ca. Upakara inucap, kasaksiang olih Kelihan Desa
- ra. Miwah pamidanda siosan manut pararem

PALET 2

INDIK NYAPIHAN

PAWOS 85

- (1) Sane kabawos nyapihan inggih punika : Sang wus marabian, palas, tan sida tinut alaki rabi.
- (2) Prade Sang nyapihan sampun polih pamutus saking Bandesa utawi sang rumawos, prajuru wenang nyobiahang ring paruman desa.
- (3) Sang palas merabian utawi sinalih tunggil lampus, kebawos balu.
- (4) Prade sang nyapihan wekasan malih adung tur mawiwaha, patut kadulurin antuk upacara upakara pawiwahan, tur keni pamidanda tulak wali mawilang harga beras manut pararem. Prade indike sapunika ngantos ping kalih utawi lintangan keni panikel apisan.

- (5) Prade wenten balu luh mulih deha, riwekas malih mawali ngarereh sentanannyane, patut keni pamidanda tulak wali, mawilang harga beras manut pararem.

PAWOS 86

- (1) Tata sulur pacang palas marabian, wenten sangkaning :
- ha. Pada lila pacang nyapihan.
 - na. Sangkaning wicara utawi pretingkah siosan sane ngawinang tan adung marabian.
- (2) Prade nyapihan sangkaning pada lila, kapatut kadi ring sor :
- ha. Polih pah-pahan paguna kaya, apah kalih.
 - na. Pabekelan mawali niri-niri.
 - ca. Warisan lan sentana kakuasa antuk sang purusa, tur kapatut ngawehin pangupajiwa lan kaweruhan ring sentana.
 - ra. Kaputus olih bandesa utawi sang rumawos, tur kakrabang ring paruman, sang purusa naur jinah pakerab manut pararem.
- (3) Prade nyapihan, wit saking wicara luire :
- ha. Anyasar laku, drati krama.
 - na. Wak parusia, wiroseng laku.
 - ca. Macecala langkungan ring 6 (nem) sasih.
 - ra. Ketitenin olih prajuru tur katiwakin pamutus, sakewanten prade tan arep, wenang katur ring Sang Rumawos.
 - ka. Pradana miwah purusa keni pamidanda manut pararem.
- (4) Indik nyapihan mangda nganutin daging Undang-Undang Perkawinan sane kemanggehang olih guru wisesa.

PAWOS 87

- (1) Swadharmaning balu luh, luire :
 - ha. Ngamargiang kapatibratan, tan drati krama.
 - na. Ngamargiang sahanan ayah krama desa manut dresta.
 - ca. Ngaraksa, nguasayang lan miara sahananing warisan lan sentana.
 - ra. Tan kengin ngadol warisan, sadurunge polih wak-wakan saking kulawarga kapurusa.
- (2) Balu luh sane tan pageh ring swadharmaning balu, luire :
 - ha. Matingkah drati krama miwah sane siosan.
 - na. Matilar tan pasadok langkungan ring 6 (nem) sasih.
 - ca. Lempas ring swadharmaning balu utawi salah prawerti.
- (3) Balu sane tan pageh kadi kecaping wiwit (2), wenang katundung olih kulawarga purusa, saha tan polih pah-pahan warisan.
- (4) Balu luh, masentana utawi tan masentana, pageh ring swadharmaning balu, tan wenang katundung, yan prade katundung, patut polih pah-pahan paguna kaya lan babekelan.

PALET 3

INDIK SENTANA

PAWOS 88

- (1) Sane kebawos sentana luire :
 - ha. Prati sentana : sentana sane kawetuang saking pawiwahan kapurusa manut agama.
 - na. Sentana rajeg : sentana sane kawetuang sakeng pawiwahan predana ngawa linggih purusa, manut agama.

- ca. Sentana paperasan : sentana antuk ngedih, kadulurin antuk upacara upakara pamerasan saha upasaksi sekala lan niskala, manut Agama.
- (2) Sentana Rajeg :
- ha. Predana karajegang pinaka purusa.
- na. Sane purusa nyeburin, pinaka predana.
- ca. Katurunannyane nganutin predana pinaka purusa.
- (3) Pamargin sentana rajeg :
- ha. Pawiwahan kalaksanayang ring paumahan sang predana pinaka purusa.
- na. Sane lanang nyadia nyeburin, mawit sampun kaingkupin olih kulawargannyane.
- ca. Kukul kasuarayang olih Prajuru, mawit saking pasadok kulawargan sang purusa, yening pamargine sampun anut.
- ra. Sang ngadegang sentana rajeg, patut polih wak-wakan saking kulawargannyane.
- (4) Sentana paperasan :
- ha. Sentana paperasan inggih punika sentana sane kapikolihang malarapan antuk meras.
- na. Ngawit paperasan, sang kaperas kaicalan linggih waris ring umah wit ipun, tur polih linggih waris sah ring sang sane meras.
- (5) Pamargin sentana paperasan :
- ha. Magama Hindu, durung alaki-rabi.
- na. Saking pancer kapurusa.
- ca. Saking kulawarga tunggal sanggah, utawi merajan, paibon, dadia.
- ra. Prade tan wenten manut aksara na miwah ca, kengin saking sapisira ugi.

- ka. Sang pacang meras oka sadurunge patut atur upeksa ring Prajuru.
- da. Prajuru digelis nyobiahang ring paruman desa, nyabran sasih ngantos ping tiga.
- ta. Prade wenten sane tan satinut, patut nyadokang ring Prajuru, sadurung tutug sengker, Prajuru patut mawosin manut kawentenannyane.
- sa. Sasampune tutug sengker tigang sasih tan wenten wicara, Prajuru pacang ngicenin pamutus, manut kadi kawentenannyane.
- wa. Sajeroning kanton wicara tan kalugra ngamargiang upakara pamerasan.
- la. Prade jagi ngawentenang pamerasan tan kalugra ngencak patus.
- ma. Deha tua utawi teruna tua kangkat meras oka, yan sampun manut kadi kecap ring wiwit (5).

PAWOS 89

Paperasan kasinanggeh sampun sah yening sampun macihna :

- ha. Pawidi widanan paperasan kapuputang olih Ida Sang Sulinggih.
- na. Kesaksiang olih Bandesa lan Manggalā Dinas saha kasobiahang ring paruman desa.
- ca. Naur jinah upasaksi, mawilang harga beras manut pararem
- ra. Kawehin ilikita, ungguan tata sulur paperasan.
- ka. Nunas penetapan sang rumawos lan akta pengangkatan anak saking Guru Wisesa.
- da. Prade paperasan tan manut kadi kecap ring aksara ha, na, ca, ra, ka, tan kasinanggeh sah ring desa.

PALET 4
INDIK WARISAN
PAWOS 90

- (1) Sane kasinanggeh warisan, inggih punika :
Harta guna kaya, harta tatadan, harta pusaka, jiwa dana, karang paumahan, sanggah utawi merajan lan utang piutang.
- (2) Sane kabaos waris, inggih punika :
Prati sentana, sentana rajeg, lan sentana paperasan.
- (3) Prade tan wenten sakadi ring wiwit (1), wiwit (2), sang kasinanggeh waris :
 - ha. Katurunan saking pancer kapurusa.
 - na. Prade tan wenten saking pancer kapurusa, kangkat saking tunggal sanggah, merajan utawi dadia.
 - ca. Prade tan wenten pacang ngawaris kadi kecap ring aksara ha, na, kadruwe antuk Desa Pakraman.

PAWOS 91

- (1) Swadharmaning waris :
 - ha. Nerima saha nguasayang warisan, ayah-ayahan, minakadi ngempon sanggah, pura, paibon, dadia, kahyangan, saha ayah-ayahan krama desa.
 - na. Upakara pitra yadnya sang kawarisin riwekas sapatutnyane.
 - ca. Naurin sautang utang sane siosan.
- (2) Prade tan manut kadi swadharmaning waris ring wiwit (1) tan kalugra nguasayang utawi nitahang arta brana warisannyane.

PAWOS 92

Waris tan polih pah-pahan warisan luire :

- ha. Sentana rajeg sane sampun sah ninggal kedaton.
- na. Sentana purusa sane sampun nyeburin, pinaka predana.
- ca. Sentana waris sane nilar Agama Hindu.

PAWOS 93

Sane kangkat ngawaris pamupu kewanten :

- ha. Balu luh.
- na. Balu muani mawit saking wiwaha nyeburin.
- ca. Sang mulih deha utawi nyapian.
- ra. Ritatkala ngawentenang padum waris, yening wenten istri deha patut polih waris apah kalih ring duman sane lanang.

PAWOS 94

Prade sajeroning kulawarga wenten waris langkungan ring adiri kapatut :

- ha. Kawentenang paigum indik pedum warisan inucap.
- na. Prade paigum tan prasida puput, kengin nunasang tatimbang ring Kelihan Desa, prade wenten tan satinut ring panepase, kengin nunasang ring Kertha Desa.
- ca. Prade ring Kertha Desa taler tan prasida puput kengin nunasang ring sang rumawos.

SADTAS SARGAH
WICARA LAN PAMIDANDA

PALET 1

INDIK WICARA

PAWOS 95

- (1) Sane patut mutusang wicara ring Desa Pakraman, inggih punika :
Kelihan Desa lan Manggala Dinas
- (2) Pamutus indik babawos nganutin daging Awig-Awig, Petitis lan Pamikukuh
Desa Pakraman.
- (3) Prade wicara inucap tan prasida mikolihang pamutus, antuk Kelihan Desa lan
Manggala Dinas, wicara punika patut katur ring Kertha Desa.
- (4) Prade ring Kertha Desa taler tan mikolihang pamutus, wicara punika katur ring
Sang Rumawos.

PAWOS 96

- (1) Sahananing wicara sane kawetuang malarapan laksana corah, baya, nungkas
awig-awig kabawos angusak-asik desa, patut kabawosin olih Prajuru tur keni
pamidanda manut pararem.
- (2) Sahananing wicara, nyewang gara, wiadin ngamedalang baos kaon, ngawinang
kayun sungsut ring anak sios, patut digelis kabaosin olih Prajuru sasampune
wenten nyadokang.
- (3) Pamutus prajuru patut pastika, nyantenang kaiwangannyane, mangdene tan
lempas ring daging awig-awig.

- (4) Prajuru patut niwakang pamidanda, ring sang sapa sira sane sisip, kabuktiang manut Tri Pramana.

PALET 2

INDIK PAMIDANDA

PAWOS 97

- (1) Prajuru Desa pakraman niwakang pamidanda ring krama sane sisip utawi lempas ring daging awig-awig.
- (2) Tatiwak pamidanda patut kalaksanayang olih Prajuru Desa.
- (3) Bacakan lan ageng alit pamidanda luire :
- ha. Nebas kasisipan.
 - na. Tulak wali apisan, mawilang harga beras manut pararem.
 - ca. Tulak wali ping kalih, mawilang harga beras manut pararem.
 - ra. Tulak wali ping tiga, mawilang harga beras manut pararem.
 - ka. Dadosan lan panikel nyane, panikel urunan lan kenan-kenan.
 - da. Ayah-ayahan panukun kasisipan.
 - ta. Pangupakara lan pangaskara.
 - sa. Rarampagan utawi lelangan.
 - wa. Saluiring pamidanda sane siosan, kapidabdabin manut pararem.
- (4) Pamidanda sane mawilang harga beras, patut kataur antuk jinah.
- (5) Jinah utawi raja brana pamidanda, ngaranjing dados druwen Desa.

PAWOS 98

- (1) Prade wenten krama desa, tan naur urunan utawi dadosan, ring panemayannyane patut keni panikel manut pararem.

- (2) Malih asasih ring panemayannyane naur, taler tan prasida kataur, patut nikel weweg, tur patut kataur malih asangkepan.
- (3) Prade sampun nikel weweg, ring panemayannyane naur, taler tan prasida kataur, wicarannyane kasukserahang ring kertha Desa.
- (4) Prade pamutus kertha desa taler tan prasida kalaksanayang, patut ngamargiang rarampagan.
- (5) Tata cara ngalaksanayang rarampagan, manut kadi ring sor puniki :
 - ha. Sadurung ngamargiang rarampagan, Prajuru patut masedek ring sang pacang karampag.
 - na. Rarampagan kamargiang olih prajuru desa kasarengin olih krama.
 - ca. Prajuru mitetesin druwen sang pacang karampag, sane patut kasawenin sane pacang kalelang, manut ring utang nyane.
 - ra. Prajuru patut miteketin sang karampag, mangda digelis nebus sadurung palelangan kamargiang.
 - ka. Prade tan prasida katebus sajeroning waneng punika, padruweannyane wenang kalelang.
 - da. Sane wenang nyarengin palelangan, krama desa sami.
 - ta. Barang sane wenang karampag, barang sane kabawos kasugihan.
 - sa. Tan wenang ngarampag barang sane ngawinang mademang pangupa jiwa lan barang sane kabawos suci.
 - wa. Prade pamargin rarampagane kapialangin olih sang karampag. Sang karampag sinanggeh tan satinut ring daging awig-awig , tur wenang kanorayang.

SAPTAMAS SARGAH

NGUWAH NGUWUHIN MIWAH NGENTOSIN AWIG-AWIG

PAWOS 99

- (1) Nguwah nguwuhin utawi ngentosin awig-awig patut kalaksanayang melarapan pamutus paruman Desa, sane karihinin antuk pamutus Usaha Saba Desa.
- (2) Pamutus paruman desa kausahayang gilik saguluk, prade tan saigum patut ngemargiang wawilangan suara.
- (3) Pidabdab wawilangan suara luire :
 - ha. Paruman kasarengin olih krama desa, sanistanyane kalih pah tiga saking wacakan keh krama desa.
 - na. Wawilangan suara sanistannyane kalih pah tiga saking keh krama desa sane nyarengin paruman inucap.

ASTAMAS SARGAH

PAMUPUT

PAWOS 100

- (1) Awig-Awig puniki kawastanin : Awig – Awig Desa Pakraman Tabu Banjaraan.
- (2) Awig-Awig puniki manggeh kalih kalaksanayang ring wewidangan Desa Pakraman Tabu Banjaraan.
- (3) Awig-Awig puniki nganinin sahanan krama lan warga Desa rauning kakuub Desa Pakraman Tabu Banjaraan.
- (4) Awig-Awig puniki, kamargiang ngawit saking kararemin antuk krama Desa Pakraman Tabu Banjaraan.

- (5) Sasampune awig-awig puniki kararemin, awig-awig sane kararemin duk rahina sukra paing matal purnama sada saka 1912 (siu sangangatus roras) utawi masehi tanggal 8 Juni 1990 nenten malih kaanggen pinaka sepat siku-siku saha kapastikayang pisan nenten kamargiang malih.

PAWOS 101

Saluiring pamargi pakraman sane durung kabawos utawi durung munggah sajeroning Awig-Awig puniki, manggeh kalaksanayang, manut tata cara sane sampun ketah mamargi.

PAWOS 102

- (1) Prajuru Desa, Usaha Saba Desa, lan Kertha Desa, sajeroning pacang ngamargiang sadaging Awig-Awig puniki, patut tan maren mawirasa ring sahanan Prayogya.
- (2) Awig-awig puniki kararemin duk paruman krama Desa Pakraman Tabu Banjaraan ring rahina Anggara Kliwon Prangbakat pinanggal kaping pitu sasih kanem Icaka wars 1938 tanggal masehi 6 Desember 2016.
- (3) Awig-Awig puniki kalingga tanganin olih Bendesa, kasaksinin olih Kelian Banjar Dinas miwah Perbekel, saha kakukuhang olih Bupati Klungkung.
- (4) Sang ngalingga tanganin luire :

Bendesa Desa Pakraman Tabu Banjaraan



Saksi

1. Kelian Banjar Dinas Tabu


Nengah Suartana

2. Perbekel Desa Selat


I Wayan Sudiana

Bupati Klungkung

Maka Murdaning pamikukuh


Nyoman Suwirta

Mengetahui dan telah dicatatkan

Tanggal : 6 DESEMBER 2016

Reg. Nomor : 189/1/H20/2016

Bupati Klungkung